

**Monday, December 1, 2025**

**Time - 2:30pm - 2:35pm**

**AKASHVANI AIZAWL  
REGIONAL NEWS UNIT**

**REGIONAL NEWS BULLETIN  
(MIDDAY)**



## **WORLD AIDS DAY**

Vawiin hi World AIDS Day 2025 a ni a, Mizoram hmun hrang hrangah he ni pual hian hun hman niin Aizawlah chuan Vanapa Hall-ah Mizoram State AIDS Control Society (MSACS) bultumin hman a ni a; kumin World AIDS Day thupui chu 'Harsatna kara AIDS hmachhawn dan thar' tih a ni.

Vawiina Vanapa Hall-a World AIDS Day hmannaah hian khuallian Assembly Speaker Pu Lalbiakzama chuan HIV darh zel tur ven kawngah theihtawp chhuah turin Mizoram mipui a ngen a; mutmawh hnarmawha an neih a tul thu a sawi.

Pu Lalbiakzama chuan khawvel changkang zelin a ken tel chu natna thar anih thu a sawi a, khawvelin natna a buaipui langsar tak chu HIV/AIDS niin, India ram state hrang hranga mihring cheng zat atanga chhutin Mizoramah HIV/AIDS vei an tam ber chu pawia tih thu a sawi a, Mizo Kristianna nen inmil lo takin an inkaichhawna tam ber mipat hmeichhiatna a ni chu a zahthlak hle tih a sawi.

### **(Byte - Speaker)**

Vanapa Hall-a World AIDS Day hmannaah hian MSACS Project Director Dr. Jane R. Ralte chuan Mizoramah a hmasa ber atan October 1990 khan HIV positive hmuh chhuah a nih thu leh kum 1990 atanga thla liamta October thla thleng khan Mizoramah HIV vei mi 33,641 hmuhchhuah an ni tawh a ti a, Mizorama HIV vei zinga zaa 70 point 3 chu mipat hmeichhiatna atanga kai an nih thu sawiin inchiuna hriau inhmanawm vanga kai zaa 27 point 3, nu-in a faa a kai zaa 1 point 8 leh kaina chhan hriat loh zaa 0 point 74 an ni a ti bawk.

Dr Jane Ralte sawi danin, mipat hmeichhiatna aṭanga HIV vei zinga zaa 55 point 3 hi kawppuite aṭanga kai an ni a ti a, hriatchian lohte nena mipat hmeichhiatna hman aṭanga kai zaa 34 point 3 an awm tih sawiin Sex aṭanga HIV vei zingah hian mipa mahni anpui kawp aṭanga inkaichhawng zaa 7 point 7 an awm a; mahni inzuarte aṭanga kai zaa 2 point 5 an awm thu a sawi bawk.

Dr Jane Ralte chuan sex aṭanga HIV vei hmuhchhuah zingah kumtin mipa mahni anpui kawp aṭanga kai an pung chho zel tih sawiin HIV chu a hlauhawm a, a enkawlna ART damdawi a awm avanga hlau lo an awm ṭhin nia hriat a nih thu sawiin, ART chu natna chak tak hmetmit tura duan a nih avangin a chak a, taksaah side effect hrang hrang a neih ṭhin avangin HIV vei lo tura an nun hmang turin Mizoram mipui, a bikin ṭhalaite a sawm a ni.



## ICTC

Mizoramah a thlawna HIV vei leh vei loh enna hmun Integrated Counselling and Testing Centre (ICTC) 39 a awm a, heng ICTC 39 atang hian April 2009 atanga kumin March thla thleng khan kum 16 chhungin HIV vei mi 28,904 hmuh chhuah an ni a; heng zinga 2,161 hi raipuar an ni.

Mizoram State AIDS Control Society (MSACS) hnuaia ICTC 39-ah hian kum 16 chhung khan raipuar 3,41,875 thisen endik a ni a, heng zinga 2,161 hi HIV vei an ni tih hmuhchhuah a ni. Kum 16 chhung hian ICTC atangin kumtin HIV vei raipuar mi 100 chuang hmuhchhuah ziah an ni a, kum 2021-22 khan HIV vei raipuar 177 hmuhchhuah niin an tam ber kum a ni a, an tlem ber kum chu kum 2018-19 niin mi 106 an ni.

ICTC-ah hian raipuar chhiar tel loin kum 16 chhung khan mi nawlpui 7,36,934 thisen endik a ni a; thisen endik zingah hian HIV vei mi 26,743 hmuhchhuah niin, mi nawlpui thisen endik zawng zawng atanga HIV vei hmuhchhuah zat hi zaa 3 point 63 a tling.

Kum 16 chhunga mi nawlpuia thisen endikna atang hian chawhrualin kum tin HIV vei thar mi 1,671 an awm ang a ni a; mi nawlpui thisen endik atanga HIV vei hmuhchhuah tam ber kum chu 2018-19 niin, hemi kum hian mi 2,557 hmuhchhuah an ni.

MSACS hnuaiah hian HIV veite enkawlina ART centre 14 a awm a; District tinah athlawna thisen endikna ICTC leh HIV veite enkawlina ART Centre hi a awm a ni.



## HANDHOLDING SCHEME

Mizoram sawrkar flagship programme Bána Kaih (Handholding) Scheme Phase-I hnuaiia loan component progress partner atana thlan mi 744 zinga mi 257 hnenah bank-te'n loan cheng nuai 2,103 point 84 an pe tawh a; progress partner atana thlan zinga bank ten loan an pek tawh hi zaa 34 point 54% an ni.

Akashvani News, Aizawl thudawn danin, Bána Kaih Scheme Phase-I hnuaiia loan component-ah hian Bána Kaih kalpuinaa sawrkarin a thawhpui bank pathum - Mizoram Rural Bank (MRB), Mizoram Cooperative Apex Bank (MCAB) leh State Bank of India (SBI)-te chuan loan la tura thlan progress partner mi 744 zinga mi 257 hnenah loan an pe tawh a; loan an pek tawh zinga 87 hi Horticulture department hnuaiia mite niin an tam ber a, AH&Vety department hnuaiia loan hmu mi 56-in an dawt a ni.

Bána Kaih Phase-I hnuaiiah hian MRB-in mi 180 hnenah loan an pe tawh a; SBI-in mi 50 hnenah leh Apex Bank-in mi 27 hnenah an pe tawh a, Bank pathumin mi 257 hnena loan an pek tawh belhkhawm hi a vaiin cheng nuai cheng nuai 2,103 point 84 (Rs 21,03,84,750) a ni tawh a ni.

Loan hmu tawh mi 257-te Bana Kaih Scheme Phase-I Impelementing Department 13 an ni a; Horticulture department hnuaiiah mi 87 niin, AH&Vety department hnuaiiah mi 56 an awm a, Commerce & Industries department hnuaiiah mi 30 niin Tourism department hnuaiiah mi 17 an awm a, Land Resources, Soil & Water Conservation department hnuaiiah mi 16 awmin, UD&PA department hnuaiiah mi 15 an awm a, Agriculture department hnuaiiah mi 11 awmin, Science & Technology hnuaiiah mi 7 an awm a, Fisheries department hnuaiiah mi 6 awmin, Sericulture department hnuaiiah mi 5 an awm a, I&PR department hnuaiiah mi 3 leh LESDE department leh Spors & Youth Services department hnuaiiah mi 2 ve ve an awm ni.



## PARLIAMENT SESSION

Parliament thlasik thutkhawm chu vawiin atangin tan a ni a, ni 19 chhungin vawi 15 thutkhawm an nei dawn a ni.

Nimin khan sawrkar chuan New Delhi ah Party zawng zawng te chu Parliament House pahnih ah rorelna tluang tak a kalpui anih theih nan a ko khawm a, political party 36 atangin hruaitu 50 an tel thei a, thutkhawm hi Defence Minister Rajnath Singh'n a kaihruai a ni. Meeting zawh a thuthar thehdarh tute a kawmna ah Parliamentary Affairs Minister Kiren Rijuju chuan sawrkar in House 2 te thlasik thutkhawm an neih chhung a tluang tak a kalpui anih theih nan political party zawng zawng te chu thawhhona tha tak nei turin a ngen a, thil pawimawh engpawh sawipui tur an nei anih chuan sawrkar chu a in peih reng thu a sawi bawk.

